

嘉慶丙子夏鐫

孔
目
目
興
縣
字
之

綠雲山房藏板

永昌縣志序

丙子春余安研於雲川書院南斗岳先生
以所為永昌志八卷來曰邑開自漢蓋云
舊矣其間陷復無常至元粗定故文獻僅
存遠者恒闕以其取材自近故事少而集
隘尤志之小者也余謂志以傳信與其徵
引附會博古是矜毋寧近守之確以當矧
自元迄今幾六百歲不可謂非遠也凡郡

永昌縣志

序

一

國之籍以縣志為其權輿帙雖不豐所關
大也顧其紀載何如耳謹受而讀之既竟
見其結構謹嚴叙論簡核殆參之太史以
著其潔者乎時邑之老成紳士僉為余言
先生景仰前徽網羅散失自歸田十年來
披覽殘編斷碣偶得其人一二事實如拱
璧輒為立傳有明人物較增於原志者以
此其於當代則廣採詳質進退惟公而已

不與譽謗罔知焉至若一統志所列方輿
多與舊史不合致滋衆議是又未可率爾
者先生於沿革古蹟之類既參稽往策復
詣勘其道里形勢務窺廬山真面其用心
有如此然自余綜觀之各卷皆逐字稱量
而出銖兩不爽匪第如所云然也嘗翻閱
官師篇知永故無志明萬歷間揮僉南公
魁與揮同趙公光遠倡而為之揮僉公即

永昌縣志

序

先生之六世祖也夫龍門一書父子繼軌
今其祖創始於前曠數代而孫擴於後亦
豈偶然哉敬綴數語而為之序

嘉慶二十一年丙子孟夏中浣

賜進士出身吏部觀政蘭山後學黃在中謹

撰並書



永昌縣志序

志者即古列國之史永為漢縣而志始於
明萬歷間草創焉爾其附在郡志者較備
乾隆己巳憲副張治齋先生所定也而邑
無專刻逮甲辰續而梓之主議者李邑侯
韋齋余叨搦管旋以義例未當遂錮其版

永昌縣志

序

一

今三十載矣頃鄉君子復商及此不禁瞿
然曰可再誤耶自揣識闇不克辨是非弁
鄙之胸又不足以徵文而攷獻矧志關得
失寓諷勸有人所欲言非志之所得言亦
有志所得言非余之所敢言以地著之人
預掌故之務直道為公良不易耳且合纂

之難也將併前後為一編有所因必有所
損益昔扶風漢書易遷八書為十志若劉
項功臣諸紀傳於舊文間經點竄論者且
不能無譏倘以不敏從茲役僭踰之愆當
復奚似哉辭弗獲已因思櫟邀自安是固
其分然自己巳至今幾七十年土會盈虛

民生愉戚以及人材之消長政治之利病
竟等於煙雲變滅致後之人罔所徵信譬
將誰歸爰與鄉邑老成廣搜博採有所得
焉則書久之寸牋尺幅壁戶皆滿廼裒輯
焉地理建置水利兵防官師人物選舉藝
文總目凡八其据古證今毫無參以己意

者事其隨筆發揮而不盡襲前人者詞詞
以詳事毋偽而誣此邑之志非余之志也
我永當西域通衢凡建節使者輪蹄所至
與夫遊人携履豪客停驂迢迢披覽邑乘
用覘風景是誠未足辱觀所異永之人家
置一冊得曉然於鄉國情形習尚臧否庶
有裨乎抑或琴室公餘俯垂流覽而加之
釐訂則又幸甚

嘉慶二十年仲夏上澣斗岳南濟漢謹序




縣域圖

永昌縣志

圖

一




縣治圖

永昌縣志

圖

二



永昌縣志

圖

四



李自恭繪

修志凡例

一志先辨類舊志堡寨橋梁概附地理是編移入建置指揮千百戶等職分載選舉茲統列于官師如此者頗多風俗專為一冊今併入地理而水利另編以其所關者重故叙較詳也要有所本非敢矯異

一往事如沿革古蹟及官師人物中有改訂者有增入者皆稽諸史冊採諸金石與其家乘或父老之口期于毋誤毋漏而已

一邇採節義志與鄰近老成再三質証必僉曰可然後叙入間有出以已意者皆確然共信非阿好也其或

永昌縣志

凡例

山深壤僻聞見難周則俟諸異日

一官評去後而定鄉評則歿後而定至于貞操匪世隱德高年者不拘此例

一志尚簡明毋庸辭費茲于每卷標首弁以總冒用存古體至各條之前有當推原者間綴數語否則無之後論亦然不盡歸于一律

一後人誣稱先代昔賢深弁廼君祖父有嘉懿以子孫操筆而顧軼之亦未為安然終嫌涉于私是編所列皆舊志已載者餘不具錄

永昌縣志目次

卷一地理志

疆域 沿革 山川 星野 風俗 祥異 戶口
土田 賦則 徭役 方產

卷二建置志

城池 官署 學校 廟祠 壇壝 倉廩 驛塘
演武 書院 義學 寺觀 粥廠 養濟 市鎮
堡寨 橋梁 古蹟 墓

卷三水利志

山水 泉水 釋名 工作 灌略 董事

永昌縣志 目次

卷四兵防志

營制 關隘 兵馬 糧餉 軍械 烽墩

卷五官師志

藩封 鎮守 指揮 教授 知縣 典史 教諭
叅將 副將

卷六人物志

文蹟 武功 忠孝 義行 節烈 耆壽 流寓

卷七選舉志

進士 舉人 貢生 軍功 掾吏 武進士
武舉 將材 封贈

卷八藝文志

記詩

永昌縣志

目次

二

永昌縣志卷之一

邑人南濟漢纂輯

勾德瑞



閔

王國賓

全校

南棠

地理志

邑當涼郡右衝故稱要隘地理務亟講也疆域攸畫沿革繫之環以山川應乎星野其間沃瘠殊俗移易在人固守土者之責而鄉士大夫顧可不身為先與紀祥異以備觀省洎戶口土田賦役物產均以類從尹釐茲土者將有所攷焉

永昌縣志

卷一

一

疆域永昌南北多高山深壑東西平行為萬里通衢封疆之限自作邑以來未之有改也總計全境廣袤六百餘里縣治在涼州府西一百六十里東至柔遠驛武威界七十里西至古城窰山丹界八十五里南至酸茨河接大通河界一百七十里北至昌寧湖鎮番界一百九十里東南至炭山堡武威界七十里西南至白石崖山丹界九十里東北至蔡旗堡鎮番界一百八十里西北至石硤口山丹界一百一十里東至蘭州府省城七百二十里由陝西達京師五千二百八十里

沿革邑本戎落禹貢西戎即叙是也秦穆公時為小月氏

國其後匈奴長休屠據之漢武帝元狩二年昆邪殺休屠
以衆降元鼎六年即休屠故地置鸞鳥縣隸武威郡此立
縣之始東漢更名顯美初屬張掖郡繼屬武威郡晉武惠
時仍顯美縣懷帝永嘉五年依焉支山改置焉支縣附武
興郡北魏仍名焉支改屬番禾郡隋開皇中廢併入武威
唐中宗神龍二年于漢故鸞鳥城置嘉麟縣景龍三年省
先天二年復置開元十六年以赤水守捉更置大斗軍天
寶末陷于吐蕃越五代未克平宋興吐蕃遠遁太宗至道
二年復唐舊置名嘉麟縣隸西涼府西涼即武威郡也景
德中為西夏李元昊所據偽置永州元滅西夏世祖至元
永昌縣志

卷一

二

十五年置永昌路封王領之降西涼府為州隸焉此稱永
昌之始明洪武二十五年置永昌衛立前後左右中五所
隸陝西行都司我
朝雍正三年改為永昌縣隸涼州府

山川出雲雨以生物故祀典不廢而功德所施厥有大小
其景趣亦殊茲品第而列之山無弗載至流之細者詳見
水利

天山直南一百八十里羗人呼天為祁連故又名祁連山
漢霍嫖姚擊敗匈奴至此而還唐薛將軍三箭所定當在
湟中舊志引之未確是山綿亘數千里終古積雪大為溉

田之資

鸞鳥山在縣西南一百八十里相傳漢時有鸞棲其上故名山亦以名縣其距縣一百五十里曰平羗山為土著出入門戶又一百四十里曰腦兒山腦兒華言水也三山銜接積雪融流耕者利之

金山城北二十里晉武帝泰始中禿髮樹機能敗涼州刺史蘇愉于此隆安中沮渠蒙遜既拔臨松遂據茲山蓋昔屯軍地也生煤炭附近居民賴以代薪又出陶器其產與正西七十里之紅山同

馬支山在西八十里匈奴歌云失我馬支山使我婦女無

永昌縣志

卷一

三

顏色一作燕支作臙脂者非攷匈奴稱妻曰闕氏音與馬支同歌意殆取此與產藥數十種大黃尤多且良故亦曰大黃山又名青松山向多松今樵採殆盡

東南七十里曰雲莊山其麓近河雲氣滃鬱因名上多松始植傳為晉僧摩阿北巖有石房中有石榻其故居也佛寺道觀高下參差雖鮮壯麗而幽潔可玩盤道有石斜與寺對天然一碑爰鐫松雲湧翠四字以顏之東距十里為石佛崖亦佳境也

東岡距城十里蜿蜒一帶夕陽獨多若晴霞若野燒然東北七十里有洞居山之半一巒前蔽如屏中供石像曰

孩母足下生甘泉，彝人多就飲之，謂能已疴。凡禱嗣者恒于斯。

獅山東北二十五里，山趾餘凸，蹲伏道側，望之宛然獅也。少西為馬蹄坂，其上馬跡重沓，車騎踐摩之，歲久猶是。俗以為神駿所遺，非也。按壽州安臺石上有人馬跡，蓋本然耳。又西為馬鞍山，亦頗髣髴。

東北之山名石燕者，距縣二十五里。谷中產石如燕，人謂當風而飛，或有之。三十里曰如邨，山石多墳起如北邨，下六十里曰青山，晴巒滴翠，若新出沐。

筆峰山東南四十里，三峰聳峙，若筆紆折而下，曰照面山。
永昌縣志 卷一 四

雨後嵐光逼堞，由城東隅望之，青如撲面，雪霽尤佳。

武當山在城北五里，以巔供真武名也。自下而上，殿宇相映，頗足遊覽。

金呂山在西北三十五里，地稱阨塞，其距縣六十里有盤道山者，鳥道一綫，迴旋而上，是亦險鎮。

摩天嶺在南七十里，孤峰入雲，最為陡絕。西南二十五里曰橫梁山，又十五里曰饅頭山，兩山斜峙，其間村落相望，錯若齒牙。

罩子山起自永寧堡北尾，抵馬鞍，距縣一百二十里。轉澗口東南，距縣三十五里，其水為天山蓄雪所化，又有